


孟東野詩集

貞


九之十



漢書門			
三	四	一	六
冊	架	函	號


內閣文庫			
三	三	漢	
二	四	書	
函	一		
八	四	六	類
冊	架	號	

內閣文庫		
番號	漢	3416
冊數	4 (4)	
函號	312	203



孟東野詩集卷第九

淺草文庫



詠物

山南西道節度參謀試大理評事平昌孟郊

宇文秀才齋中海柳詠

玉縷青葢蕤結為芳樹姿忽驚明月鈎鈎出珊

瑚枝灼灼不死花蒙蒙長生絲飲栢况泛一作仙

味詠蘭擬一作古詞霜風清颼颼與君長相思

揺柳一作採柳

弱弱本易驚着着執難定因風似醉舞盡日不
能正時邀詠花女笑輟春糴鏡

曉鶴

曉鶴彈古舌婆羅門叫音應吹天上律不使塵
中尋虛空夢皆斷歎啼安能禁如開孤月口似
說明星心既非人間韻枉作人間禽不如相將
去碧落窠巢深

和薔薇花歌

仙機札札一作織鳳凰花開七十有二行天霞
落地攢紅光風枝嫋嫋時一颺飛散葩馥逸空
王忽驚錦浪洗新色又似宮娃逞粧飾終當一
使移花一作根還比蒲桃天上植

邀人賞薔薇

蜀色庶可此楚叢亦應無醉紅不自力狂豔如
索扶麗藻惜未掃宛枝長更紆何人是花仁詩
老強相呼

和宣州錢判官使院廳前石楠樹

大朴既一剖衆材爭萬殊懿茲南海華來與北
壤俱生長如自惜雪霜無凋淪籠籠挹靈秀簇
簇袖芳膚寒日吐再艷賴子流細珠鴛鴦花數
重翡翠葉四鋪兩洗新粧色一枝如一姝聳異
敷庭際傾妍來坐隅散彩飾机按餘輝盈盤盃

高意一作因一作造化常情逐榮枯主公方寸

中陶植在須臾養此奉君子賞觀日為娛始覺

石楠詠價傾賦西都棠頌庶可比桂詞難以踰

因謝丘墟木空採一作落泥塗時來開佳姿道

去卧枯株爭芳無由緣受氣如鬱紆袖肝在郢

匠嘆息何踟蹰

酬鄭毗躑躅詠

不似人手致豈關地勢偏孤光裊餘翠獨影舞

多妍迸火燒閑地紅星墮青天忽驚物表物嘉

客為留連

品松

追悲謝靈運不得殊常封縱然孔與顏亦莫及

此松此松天格高聳異千萬重孤擎拒古手擘

裂少室峯擘裂風雨停孤擎指爪臚道入難抱

心學生易墮蹤時時數點仙嫋嫋一線龍霏微

嵐浪際遊戲顥興濃品松徒高高雌鳴一作詎

雍雍賞異尚可貴賞潛誰能容名華非典實翦

棄徒纖茸刻削大雅文所以不敢慵

答李員外小榼味

一拳芙蓉水傾玉何泠泠仙清夙已高詩味今

更馨試啜月入骨再銜愁盡醒荷君道古誠使

我善飛一作振鋼

井上枸杞架

深鎖銀泉甃高葉架雲空不與凡木並自將仙
蓋同影踈千點月聲細萬條風逆子鄰溝外飄
香客位中花盃承此飲椿歲小無窮

蜘蛛諷

萬類皆有生各各稟天和蠶身與汝身汝身何
太訛蠶身不為已汝身不為它蠶絲為衣裳汝
絲為網羅濟物幾無功害物日已多百蟲雖切

恨其將奈爾何

蚊

五月中夜息饑蚊尚營營但將膏血求豈覺性
命輕顧已寧自愧飲人以偷生願為天下憮一
使夜景清

燭蛾

燈前雙舞蛾狀生何太切想爾飛來心惡明不
惡滅天若百尺高應去掩明月

和錢侍郎甘露

玄女何以言瑞露青松繁忽見垂書跡還驚涌

三集卷九
四
澧源春枝晨娟娟香味曉翻翻子禮忽來獻目
心固易敦清風惜不動薄霧肯蒙昏嘉畫色更
晶仁慈久乃存一方難獨占天下恐爭論側聽
飛中使重榮華一作萃德門從公樂萬壽餘慶及
兒孫

雜題

和令孤侍郎郭郎中題項羽廟

碧草凌古廟清塵鏢秋牖當時獨宰割猛志誰
能降鼓氣雷作敵劍光電為雙新悲徒自起舊
恨一作懷舊空浮江

讀張碧集

天寶太白歿六義已消歇大哉國風本喪而王
澤竭先生今復生斯文信難缺下筆證興亡陳
詞備風骨高秋數奏琴澄潭一輪月誰作採詩
官忍之一作教不揮燄

聽琴

颼颼微雨收翻翻橡一作柶葉鳴月沉亂峯西寥
落三四星前溪忽調琴隔林寒琤琤聞彈正弄
聲不敢枕上聽迴燭整頭簪漱泉立中庭定步
履一作履齒深兒禪目冥冥微風吹衣襟亦認官

徵聲學道三十年未免憂死生聞彈一夜中會
盡天地情

聞夜啼贈劉正元

寄泣須寄黃河泉此中怨聲流徹一作到天愁人
獨有夜燈見一紙鄉書淚滴穿

喜雨

朝見一片雲暮成千里雨淒清濕高枝散漫沾
荒土

終南山下作

見此原野秀始知造化偏山村不假陰流水白

一作雨田家家梯碧峯門門鎖青煙因思蛻骨
人化作飛桂仙

觀種樹

種樹皆待春春至難久留君看朝夕花誰免別
離愁心意已零落種之仍未休胡為好奇者無
事自買憂

春後雨

昨夜一霎雨天意蘇羣物何物最先知虛庭草
爭出

答友人贈炭

青山白屋有仁人贈炭價重雙烏銀驅却坐上
千重寒燒出爐中一片春吹霞弄日光不定暖
得曲身成直身

爛柯石

仙界一日內人間千歲窮雙碁未徧局萬物皆
為空樵客返歸路斧柯爛從風唯餘石橋在猶
自凌丹虹一作猶有靈丹紅

尋言上人

萬里莓苔地不見驅馳蹤唯開文字牕時寫日
月容竹韻漫蕭屑草花徒織一作蒙茸披霜入衆

木獨自識青松

噴玉布

去塵咫尺步出笑康樂嚴天開紫石屏泉縷作
鏤明月簾偕凝刻削跡靈綻雲霞織悅開若有
待瞥見終無厭俗玩詎能近道嬉方可淹踏着
不死機欲歸多浮嫌古醉今忽醒今求古仍潛
古今相共失語默兩難恬贈君噴玉布一濯高
漸漸

姑蔑城

勁越既成土強吳亦為墟皇風一已被茲邑信

平居撫俗觀舊跡行春布新書興亡意向在綿
歎空躊躇

崢嶸嶺

疏鑿順高下結構橫煙霞坐嘯郡齋肅玩奇石
路斜古樹浮綠氣高門結朱華始見崢嶸狀仰
止逾可嘉

尋裴處士

涉水更登陸所向皆清真寒草不藏徑靈峯知
有人悠哉鍊金客獨與煙霞親曾是欲輕舉誰
言空隱淪遠心寄白日一作日華法廻青春對此

欽勝事胡為勞我身

子慶詩

王家事已奇孟氏慶無涯獻子還生子義之又
有之鳳兮且莫歎鯉也會聞詩小小豫章甲纖
纖玉樹姿人來唯仰乳母抱未知慈我欲揀其
養放麝者是誰

憇淮上觀公法堂

動覺日月短靜知時歲長自悲道路人暫宿空
閣堂孤燭讓清畫紗巾欽輝光高僧積素行事
外無剛強我有巖下桂頭為爐中香不惜青翠

姿為君一作師揚芬芳淮水色不汚汗流徒渾黃
且將琉璃意淨綴芙蓉章明日還獨行羈愁來
舊腸

江邑春霖奉贈陳侍御

江上花木凍雨中零落春應由放忠直在此成
漂淪嘉艷皆損汚好音唯殷勤天涯多遠限雪
涕盈芳辰坐哭青草上卧吟幽水濱興言念風
信得意唯波鱗枕蓆病流濕簷楹若飛津始知
吳楚水不及京洛塵風浦蕩歸棹沉陂陷征輪
兩途日無遂相贈唯沾巾

溧陽秋霽

晚雨曉猶在蕭寥激前階星星滿衰鬢耿耿入
秋懷舊識半零落前心驟相乖飽泉亦恐醉揚
官肅如齋上客處華池下寮宅枯崖叩高占生
物齟齬回難諧

列仙文

大霞霏晨暉元氣無常形玄轡飛霄外八景乘
高淸手把玉皇袂携我晨中生玄挺自嘉會金
書拆華名賢女密所妍相期洛水駢

右方諸青童君

欵駕空清虛徘徊西華館瓊輪豎晨抄虎騎逐
煙散惠風振丹旌明燭朗八煥解襟墉房內神
鈴鳴璀璨栖景若林柯九絃空中彈遺我積世
憂釋此千載款怡眄無極已終夜復待旦

清虛真人

駕我八景輿欵然入玉清龍羣拂霄上虎旗攝
朱兵逍遙三絃際萬流無暫停哀此去留會劫
盡天地傾當尋無中景不死亦不生體彼自然
道寂觀合大冥南嶽挺直幹玉英曜穎精有任
靡期事無心自虛靈嘉會絳河內相與樂朱英

金母飛空歌安度明

丹霞煥上清八風鼓太和迴我神霄輦遂造嶺
玉阿咄嗟天地外九圍皆我家上採白日精下
飲黃月華靈觀空無中鵬路無間邪顧見魏賢
安濁氣傷汝和勤研玄中思道成更相過

夏日謁智遠禪師

吾師當幾祖說法云無空禪心三界外宴坐天
地中院靜鬼神去身與草木同因知護王國滿
鉢盛毒龍斗數塵埃衣謁師見真宗何必千萬
劫瞬息去樊籠盛夏火為日一堂十月風不得

為弟子名姓掛儒宮

訪嵩陽道士不遇

先生五兵遊文煇藏金鼎日下鶴過時人間空
落影常言一粒藥不隨生死境何當列禦冠去
問仙人請

聽藍溪僧為元居士說維摩經

古樹少枝葉真僧亦相依山木自曲直道人無
是非手持維摩偈心向居士歸空景忽開霽雪
花猶在衣洗然水溪晝寒物生光輝

借車

借車載家具家具少於車借者莫彈指貧窮何

足嗟百年徒校

一作

走萬事盡隨花

喜符郎詩有天縱

念符不由級屹得文章階白玉抽一毫綠珉已
難排偷筆作文章乞墨潛磨楷海鯨始生尾試
擺蓬壺渦幸當禁止之勿使恣狂懷自悲無子
嗟喜妬雙喙喙

憑周况先輩於朝賢乞茶

道意勿乏味心緒病無棕蒙茗玉花盡越甌荷
葉空錦水有鮮色蜀山饒芳藂雲根終翦綠印

縫已霏紅曾向貴人得最將詩叟同幸為乞寄
來救此病窮一作劣躬

上昭成閣不得於從姪僧悟空院嘆嗟
欵上千級尺一作閣問天三四言未盡數十登心
目風浪翻手手把驚魄脚踏墜魂却流至舊
手傍掣猶欵奔老病但自悲古蠹木萬痕老力
安可誇秋海萍一根孤叟何所歸晝眼如黃昏
常恐失好步入彼市井門結僧為親情策竹為
子孫此誠徒切切此意空存存一寸地上語高
天何由聞

魏博田興尚書聽姨命不立非夫

君子耽古禮如饒魚吞鈎昨聞敬姨言掣心東
北流 田尚書與禮相綢繆善詞聞天下一
日一再周

讀經

垂老抱佛脚教妻讀黃經經黃名小品一紙千
明星曾讀大般若細感盱響聽當時把齋中方
寸抱萬靈忽復入長安蹴踏日月寧老方却歸
來收拾可丁丁拂拭塵机按開函就孤亭孺書
難借索僧籤饒芳馨驛驛不開手鏗鏗聞異鈴

得善如焚香去惡如脫腥安得顏子耳曾未如此聽聽之何有言德教貴有形何言中國外有國如海洋海萍國教異天聲各泠泠安排未定時心火競熒將如度幾者替盡形元冥

謝李輞再到

等閑拜日晚夫妻猶相瘡况是賢人冤何必哭飛揚昨夜夢得劍為君藏中賜會將當風烹血染布衣裳勞君又扣門詞句失尋常我不忍出廳血字濕土牆血字耿不滅我心懼惶惶會有鏗鏘夫見之日生光生光非等閑君其且安詳

忽不負喜盧仝書船歸洛

貧孟忽不負請問孟何如盧仝歸洛船崔嵬但載書江潮清翻翻淮潮碧徐徐夜信為朝信朝信良卷舒江淮君子水相送仁有餘我去官色衫肩經入君廬喃喃肩經郎言語傾琪琚琪琚鏗好詞鳥鵲躍庭除書船平安歸喜報鄉里閭我願拾遺柴巢經於空虛下免塵土侵上為作與雲霞居日月更相鎖道義分明儲不願空岩堯但願實工夫實空二理微分別相起予經書荒蕪多為君勉勉鋤勉不敢專傳之方在諸

孟東野詩集卷第九

孟東野詩集卷第十

山南西道節度叅謀試大理評事平昌孟郊
哀傷

弔國殤

徒言人最靈白骨亂縱橫如何當春死不及羣
草生堯舜宰乾坤器農不器兵秦漢盜山岳鑄
殺不鑄耕天地莫生金生金人競爭

弔北干墓

殷辛帝天下馱為天下尊乾綱既一斷賢愚無
一門佞是福身本忠是喪已源餓虎不食子人

無骨肉恩日影不入地下埋冤死鬼有骨不為
土應作直木根今來過此鄉下馬弔此墳靜念
君臣間有道誰敢論

弔元魯山十首

搏鷲有餘飽魯山長飢空豪人飫鮮肥魯山飯
蒿蓬食名皆霸官食力乃老農君子恥新態魯
山與古終天璞本平一人巧生異同魯山不自
剖全璞竟沒躬

自剖多是非流濫將何歸奔競一作立詭節凌
侮爭怪輝五帝坐銷鑠萬類隨哀微以茲見魯

山道蹇無所依

君子不自蹇魯山蹇有因苟含天地秀皆是天
地身天地蹇既甚魯山道莫伸天地氣不足魯
山食更貧始知補元化竟須得賢人

賢人多自霾道理與俗乖細功不敢言遠韻方
始諧萬物飽為飽萬人懷為懷一聲苟失所衆
憾來相排所以元魯山饑哀難與偕

遠階無近級造次不可昇賢人繫腸胃寒日空
澄凝血誓竟訛繆高明易煎蒸以之驅魯山踈
迹去莫乘

言從魯山宦盡化堯時心豺虎恥狂噬齒牙閉
霜金一作針競來闢田土相與耕欽岑當宵無闕
鎖竟歲饒歌吟善教復一作履天術美詞非俗箴
精微自然事視聽不可尋因書魯山績庶合簫
韶音

簫韶太平樂魯山不虛作千古若有知百年幸
如昨誰能嗣教化以此洗浮薄君臣貴深遇天
地有靈橐力運既艱難德符方合莫名位苟虛
曠聲明自銷鑠禮法雖相救貞濃易糟粕哀哀
元魯山畢竟誰能度

當今富教化

一作聖朝
禮嘉士

元后得賢相冰心鏡哀

古霜議清遐障幽埋盡洗洗滯旅免流浪唯餘
魯山名未獲旌廉讓二三貞苦士刷視聳危望
髮秋青山夜目斷丹闕亮誘類幸從茲嘉招固
非妄小生奏狂猶感惕增萬狀
黃犢不知孝魯山自駕車非賢不可妻魯山竟
無家俱養恥它力言詞豈纖瑕將謠魯山德蹟
海誰能涯

遺嬰盡鷓乳何況肉骨枝心腸結苦誠胃臆重
甘溼事已出古表誰言獨今奇賢人毋萬物愷

涕流前詩

哭李觀

志士不得老多為直氣傷
阮公終日哭壽命固難長
顏子既殂謝孔門無輝光
文星落奇曜寶劍摧脩銘
常作金應石忽為宮別商
為爾弔琴瑟斷絃難再長
偏轂不可轉隻翼不可翔
清塵無吹噓委地難飛揚
此義古所重此風今已亡
自聞喪元賓一日入九疋
沉痛此丈夫驚呼彼穹蒼
我有出俗韻勞君疾惡腸
知音既已矣微言一作善誰能彰
旅葬無高墳一作孤裁一作松不成行

哀歌動寒日贈淚沾晨霜
神理本宵宵一作冥冥今來更茫茫
何以蕩悲懷萬事付一觴

李少府廳弔李元賓遺字

元賓題少府隱云宿從叔

宅有感有其義而無其辭

零落三四字忽成千萬年
那知冥冥客不有補亡篇
斜月弔空壁旅人難獨眠
一生能幾時百慮來相煎
戚戚故交淚幽幽長夜泉
已矣難重言一言一潛然

悼吳興湯衡評事

君生一作在雲水清君歿雲水渾
空令骨肉情哭

得白日昏大夜不復曉古松長閉門琴絃綠水
絕詩句青山存昔為芳春顏今為荒草根獨問
冥冥理先儒未曾言

哀孟雲卿嵩陽荒居

戚戚抱幽獨晏晏沉荒居不聞新歡笑但覩舊
詩書藝蘖意彌苦耕山食無餘定交昔何在至
戚今或踈薄俗易銷歇淳風難久舒秋蕪上空
堂寒槿落枯渠雜草恐傷蕙攝衣自理鋤殘芳
亦可餌遺秀誰恐除徘徊未能去為爾涕漣如

哭盧貞國

一別難與期存亡易寒燠下馬入君門聲悲不
成哭自融富才藝當異深榮祿皇天負我賢遺
恨至兩目平生嘆無子家事親相囑

傷舊遊

去春會處今春歸花數不減人數稀嘲笑片時
暮成泣東風一向還西輝

弔房十五次卿少府

日高方得起獨賞些些春可惜宛轉鶯好音與
它人昔年此氣味還走曲江濱逢着韓退之結
交方殷勤蜀客骨目高聰辨鈕戟新如何昨日

歡今日見無因英奇一謝世視聽一為塵誰言
老淚短淚短沾衣巾一作足

逢江南故書上人會中鄭方回上人往

五十篇相贈云
以為它日之念

相逢失意中萬感因語至追思東林日掩抑北
印淚筐篋有遺文江山舊清氣塵生逍遙注一作
篇墨故飛動字荒毀碧澗居虛無青松位珠沉
百泉暗月死羣象閱永謝平生言知音豈容易

哭秘書包大監

哲人卧病日賤子泣玉年常恐寶鏡破明月難

再圓文字未改素聲容忽歸玄始知知音稀千
載一絕絃舊館有遺琴清風那復傳

悼幼子

一閉黃蒿門不聞白日事生氣散成風枯骸化
為地負我十年恩欠爾千行淚洒之北原上不
待秋風至

悼亡

山頭明月夜增輝不照重泉下泉下雙龍無再
期金蠶玉鷺空銷化朝雲暮雨成古墟蕭蕭野
竹風吹亞

弔李元賓墳

晚上荒涼原弔彼冥冥魂眼咽此時淚耳悽在
日言寂寂千萬年墳鎖孤松根

覽崔爽遺文因抒幽懷崔君歿於南方

墮淚數首文悲結千里墳蒼旻且留我白日空
遺君仙鶴未巢月哀鳳先墜雲清風獨起時舊
語如再聞瑶草罷歲蕤桂花休氛氲萬物與我
心相感吳江濱

峽哀十首

昔多相與笑今誰相與哀峽哀哭幽魂一作夢嗽

嗽風吹來墮魄抱空月出沒難自裁齏粉一門

間春濤百丈一作尺雷峽水聲不平碧沲牽清洄

沙稜箭箭一作箭急波齒斷斷開呀彼無底吮待

此不測災谷號相噴激石怒爭旋迴古罪有復

鄉今縲多為鼎字孤徒髣髴銜雪猶驚猜薄俗

少直腸交結須橫財黃金買相弔幽泣無餘淮

我有古心意為君空摧顏

上天下天水出地入地舟石劔相劈斫石波怒

蛟虬花木疊宿春風颺凝古秋幽怪窟穴語飛

聞盱響流沉哀日已深銜訴將何求

三峽一線天三峽萬繩泉上仄碎日月一掣狂
漪漣破魄一兩點凝幽數百年峽輝不停午峽
險多饑涎樹根鎖枯棺孤骨裊裊懸樹枝哭霜
棲哀韻杳杳鮮逐客零落腸到此湯火剪性命
如紡績道路隨索綠奠淚一作弔波靈波靈將
閃然

峽亂鳴清磬一峽亂產石為鮮鱗噴為腥雨涎
吹作黑井身怪光閃衆異餓劍唯待人老腸未
曾飽古齒齧嶠嶠嶠齒三峽泉三峽聲斷斷
峽嶠一作蛟老解語百丈潭底聞毒波為計校飲

血養子孫既非臯陶吏空食沉獄一作兔潛怪
何幽幽魄說徒云云峽聽哀哭泉峽弔鰥寡猿
峽聲非人聲劔水相劈翻斯誰士諸謝奏此沉
苦言

讒人峽亂心渴罪呀然潯所食無直腸所語饒
鼻音石齒嚼百泉石風號千琴幽哀莫能遠分
雪何由尋月魄一作高卓卓峽窟一作清沉
銜許何時明抱痛已不禁犀飛空波濤裂石千
嶽岑

峽稜剗日月日月多摧輝物皆斜仄生鳥亦斜

仄飛潛石齒相鎖沉魂招莫歸恍惚清泉甲班
爛碧石衣餓噬潺湲號涎似泓法肥峽春不可
遊腥草生微微

峽景滑易墮峽花怪非春紅光根潛涎碧兩飛
沃津巴谷蛟螭心巴鄉魍魎親瞰生不問賢至
死獨養身腥語信者誰拗歌歡非真仄田無異
稼毒水多瘴鱗異類不可友峽哀哀雞伸

峽水劔戟寧峽舟霹靂翔因依虺蜴手起坐風
兩忙峽旅多竄官峽氓多非良滑心不可求滑
習積已長漠漠涎霧起斷涎水光渴賢如之

何忽在水

此一作中央

泉鳴作人語蛟虬吸山波能於白日間諂欲晴
風和駭智蹶衆命蘊腥布深蘿齒泉無底貧鋸
涎在處多仄樹鳥不巢蹕俗猿相過峽哀不可
聽峽怨其柰何

吉殤九首并序

吉殤花乳也霜翦而落因悲昔嬰故作是詩
凍手莫弄珠弄珠珠易飛驚霜莫翦春翦春無
光輝零落小花乳爛斑昔嬰衣拾之不盈把日
暮空悲歸

地上空拾星枝上不見花哀哀孤老人戚戚無
子家豈若沒水鳧不如拾巢雅浪穀破便飛風
鷓裊相誇芳嬰不復生向物空悲嗟

應是一線淚入此春木心枝枝不成花片片落
翦金春壽何可長霜哀亦已深常時洗芳泉此
日洗淚襟

兒生月不明兒死月始光兒月兩相奪兒命果
不長如何此英、亦為弔蒼、甘為墮地塵不
為末世一作世本芳

踏地恐土痛損彼芳樹根此誠天不知翦棄我

子孫聖枝有干落芳命無一存誰謂生人家春
色不入門

泐泐霜殺春枝枝疑纖刀木心既零落山竅空
呼號班班落地英點點如明膏始知天地間萬
物皆不牢

哭此不成春淚痕三四班失芳蝶既狂失子老
亦孱且一作豈無生生力自一作廿有死死顏靈鳳
不銜訴誰為扣天關

此兒自見災花發多不諧窮老收碎心永夜抱
破懷聲死更何言意死不必啣病叟無子孫獨

立猶束柴

霜似敗紅芳翦啄十數雙參差呻細風噉喙沸

一作戲淺江泣疑一作不可消謂一作恨壯難自降

空遺舊日影怨彼一作小書此

弔江南老家人春梅

念爾筋力盡違我衣食恩奈何麤獮兒生鞭見

死痕舊使常以禮新怨一作將誰吞胡為乎泥

中一作天消歇教義源

哭李丹負外并寄杜中丞

生死方知交態存忍將齟齬報幽魂十年同在

平原客更遣何人哭寢門

哭劉言史

詩人業孤峭餓死良已多相悲與相笑累累其

奈何精異劉言史詩腸傾珠河取次抱置之一作

取次為飛過東溟波可惜大國謠聽為四夷歌

常於衆中會顏色兩切磋今日果成死一作

喪之洛河洛岸遠相弔酒淚雙滂沱

弔盧殷十首

詩人多清峭餓死抱空山白雲既無主飛出意

等閑久病牀席尸護喪童僕孱故書窮鼠啣狼

籍一室間君歸新鬼鄉我面古玉一作顏羞見
入地時無人叫追攀百泉空相弔日夕一作哀
潺：

唧唧復唧唧：千古一月色新：復新：千古一
花春印風噫孟郊蒿秋葬盧殷北印前後客相
弔為埃塵北印棘針草淚根生苦辛烟火不自
煖筋力早已負幽薦一盃泣瀉之清洛濱添為
斷腸聲愁殺長別人

棘針風相彌破碎諸苦哀苦哀不可聞掩耳亦
入來哭絃多更聲恨涕有餘摧噫負氣已焚噫
死心更灰夢世浮閃閃淚波深洄洄薤歌一以
去蒿閑不復開

登封草木深登封道路微日月不與光莓苔空
生衣可憐無子翁虬蟬綠病肌攣卧歲時長連
漣但幽噫幽噫虎豹聞此外相訪稀至親唯有
詩抱心死有歸河南韓先生後君作因依磨一
片嵌巖書千古光輝

賢人無計拔生苦死徒誇它名潤子孫君名潤
泥沙可惜千首文閃如一朝花零落難苦言作
留久起坐空驚嗟

耳聞陋巷生眼見魯山君
餓死始有名餓名高
氛氳翹叟老壯氣感之為憂
雲所憂唯一泣古今相紛紛
平生與君說逮此俱云云

初識漆鬢髮爭為新文章
夜踏明月橋店飲吾
曹床醉啜二盃釀名郁一縣香
寺中摘梅花園
裏翦浮芳高嗜綠蔬一作羹
意輕肥膩羊吟哦
無滓韻言語多古腸白首忽然至
盛年如偷將
清濁俱莫追何須罵滄浪

前賢多哭酒哭酒免哭心
後賢試銜之哀至無
不深少年哭酒時白髮亦以侵
老年哭酒時聲

韻隨生沉寄言哭酒賓
勿作登封音登封後放
聲天地竟難尋

同人少相哭異類多相號
始知禽獸癡却至天
然高非子病無淚非父念
莫勞如何裁親踈用
禮如用刀孤喪鮮匍匐
閉哀抱鬱陶煩他手中
葬誠信焉能褒嗟嗟無子
翁死棄如脫毛

聖人哭賢人骨化氣為星
文章飛上天列宿增
晶熒前古文可數今人文
亦靈高名稱謫仙昇
降曾莫停有文死更香
無文生亦腥為君鏗好
辭永傳作謚寧

聯句

有所思聯句

相思繞我心日夕千萬重
年光坐晚晚春淚銷
顏容^如臺鏡晦舊暉
庭草滋新首望夫山上石
別劍水^{池一作中龍愈}

遣興聯句

我心隨月光寫君庭中央
如月光有時晦我心
安所忘愈常恐金石契
斷為相思腸如平生無
百歲歧路有四方愈四方
各異俗適意非所將
郊鴛蹄顧柱抹逸翮遺稻梁
愈時危抱獨沉道

泰懷同翔如獨居久寂
默相顧聊慨慷慨慷夫
矢志可以耀鋒鏖如
蘧寧知卷舒孔顏識行藏
愈朝鑒諒不遠佩蘭永芬芳
如苟無夫子聽誰
便知音揚愈

贈劍客李園聯句

天地有靈術得之者唯君
如築爐地區外積火
燒氛氲愈照海樂幽怪
滿空歎異氛如山磨電
奕奕水淬龍蝟愈太一
裝以寶列仙篆其文
如可用懾百神豈唯壯
三軍愈有時幽匣吟忽
似深潭聞如風胡久已死
此劍將誰分愈行當

獻天子然後致殊勲却豈如豐城下空有斗間
雲愈

讚

讚維摩詰

貌是古印言是空音在酒不飲在色不淫非獨
僧禮亦使儒欽感此補亡書謝懸金

書

上常州盧使君書

道德仁義天地之常也將有人主張之乎將無
人主張之乎曰賢人君子有其位言之可以周

天下而行也無其位則周身言之可也周身言
之可周天下言之不可也仲尼當時無其位言
之亦不可周天下而行也及至著書載其言則
周萬古而行也豈唯周天下而已哉仲尼非獨
載其言周萬古而行也前古聖賢得仲尼之道
則其言皆載之周萬古而行閣下道德仁義之
言已聞周天下誦之久矣其後著書君子亦當
載矣周萬古而行也幸甚幸甚道德仁義之言
天地至公之道也君子著書期不朽亦天地至
公之道夫何讓哉是故不以道德仁義事其君

者以盜賊事其君也不以道德仁義之衣食養其親者是盜賊養其親也閤下既以道德仁義事其君聞之天下久矣小子顯求閤下道德仁義之衣食以為養也謂之中庸之道謂之中庸則敢求也謂之特達則不敢求也小子嘗衣食宣武軍司馬陸大夫道德仁義之矣陸公既沒又嘗衣食此郡前守吏部侍郎韋公道德仁義之矣韋公既去衣食亦去道德仁義顯其主張謹載是書及檀文又有子遇之書同乎緘獻輕重可否顧一言陳謝誠異於異日不宣郊再拜

又上養生書

天之與人一其道也天地不棄於人人自棄於天天可棄於人乎曰不可人自棄也已曰人皆棄之乎曰賢人君子不棄也凡人棄之可天有殺物之心而無棄物之心天有棄物之心則萬物莫能生矣是故君子之於萬物皆不棄也而況於身乎棄其身是棄其後也棄其後是棄其先也故曰君子之道豈易哉敢不泐天而行身乎所以君子養其身養其公也小人養其身養其私也身以及家家以及國國以及天下以公

道養天下則天下肥也以私道養天下則天下
削也養身之道豈容易哉養其公者天道養也
養其私者人情養也以天道養其人則合天矣
以人情養其人則不合天矣以人情養其人自
棄矣天道質也人情文也天道靜也人情動也
質者生之侈也靜者生之得也動者生之棄也
文不以質勝之則文為棄矣動不以靜制之則
動為棄矣天者水之謂也人者魚之謂也魚棄
水則蝼蟻得之矣人棄天則疾病得之矣魚可
安於水而不可翫於水其失也在于恣波浪而

不迴也人可安於天而不可翫於天其失也在
乎恣嗜慾而不迴也所謂安於天者法天之味
而食之食不違於四時也法天之聽而聽之聽
不違於五節也法天之明而視之視不違於五
色也食與視聽苟違於天則疾病得之矣故曰
君子法天而行身也小人翫天而棄身也書之
座右嵇康猶有所棄秦之醫和晉之杜蒯其亦
不書於右則何以為君子之座哉良藥苦口也
苦口獲罪於人苟或有矣仁義之獲罪於天未
之有也恩養下將遠辭違書寫至誠之言不勝

惶悚之甚不宣却再拜

孟東野詩集卷第十

東野詩世傳汴吳鏤本五卷一百二十四篇
周安惠本十卷三百三十一篇別本五卷三
百四十篇蜀人蹇濬用退之贈郊句纂成池
集二卷一百八十篇自餘不為編秩雜錄之
家自異今總括遺逸擿去重複若體制不
類者得五百一十一篇登別樂府感興詠懷
游適居處行役紀贈懷寄酬答送別詠物雜
題哀傷聯句十四種又以贊書二系于後合
十卷嗣有所得當次第益諸十聯句見昌黎

五言律集

集章章於時此不著云集賢校理常山宋敏

求題

